

*Ákvæði til bráðabirgða.*

Kirkjuráð skal tilnefna stjórn skólans eins skjótt og kostur er eftir að reglur þessar hafa öðlast gildi. Starfstími þeirrar stjórnar er frá 1. febrúar árið 2001 til loka maímánaðar 2003. Endurskoða skal starfsreglur þessar innan tveggja ára.

*Gjört í Reykjavík, 8. nóvember 2000.*

Jón Helgason  
forseti kirkjuþings.

Gunnar Sveinsson  
þingskrifari.“

Starfsreglur þessar eru hér með kunngerðar almenningi.

*Reykjavík, 8. nóvember 2000.*

F. h. kirkjuráðs,

**Karl Sigurbjörnsson** biskup Íslands.

## AUGLÝSING

### um starfsreglur kirkjuþings um prestssetrasjóð.

„STARFSREGLUR  
um prestssetrasjóð.

#### Staða prestsseturs.

##### 1. gr.

Hvert lögboðið prestssetur er hluti af embætti prestsins. Prestur er vörslumaður prestsseturs og ber ábyrgð á því ásamt prestssetrasjóði, sem starfar í umboði kirkjuþings.

##### 2. gr.

Hvert lögboðið prestssetur er sérstök og sjálfstæð rekstrareining samkvæmt reglum þessum.

Hverju lögboðnu prestssetri tilheyrir fyrningarsjóður er varðveittur í prestssetrasjóði og sjóðsstjórn stýrir. Úr fyrningarsjóði hvers prestsseturs greiðist kostnaður vegna prestssetursins, svo sem vegna nýframkvæmda og endurbóta, svo og annar tilfallandi kostnaður við prestssetrið, annar en sá sem prestur greiðir. Í fyrningarsjóð greiðast hreinar tekjur af hlunnindum viðkomandi prestsseturs, húsaleiga og aðrar tekjur sem stjórn sjóðsins fer með og bókfærir hjá hverju prestssetri.

##### 3. gr.

Prestur hefur öll lögmæt og eðlileg afnot prestsseturs, meðan hann gegnir prestsembætti. Prestur hefur umsjón með og hirðir arð af prestssetri og gætir hlunninda samkvæmt samkomulagi við prestssetrasjóð. Prestur getur eigi ráðstafað prestssetri eða réttindum sem því tengjast, þannig að bindi prestssetrasjóð og/eða þannig að ráðstöfun gildi lengur en hann gegnir embætti sínu, án samþykkis stjórnar prestssetrasjóðs og annarra lögmæltra aðilja hverju sinni. Prestur getur ekki, án samþykkis stjórnar prestssetrasjóðs, gert löggerninga sem fela í sér óeðlilega ráðstöfun prestsseturs, miðað við eðlileg og hefðbundin not þess. Alla löggerninga, sem fela í sér varanlega skerðingu eða breytingu á prestssetri, ásýnd þess – eða viðbætur við prestssetrið – gerir stjórn prestssetrasjóðs, svo og löggerninga vegna réttinda sem undanskilin kunna að vera afnotarétti prests.

**Um smávægilegar lagfæringar og úrbætur á prestssetrum.**

## 4. gr.

Prestur ábyrgist og kostar minniháttar lagfæringar og úrbætur sem verður þörf á á prestssetri vegna venjulegrar notkunar á því.

Ef slíkra framkvæmda verður þörf vegna laklegs ástands prestsseturs, sem presti verður ekki gefin sök á, eða þeirra er oftast þörf en eðlilegt má telja, miðað við aðstæður allar, má þó undanskilja prest ábyrgð og kostnaði á því.

**Um afgjald fyrir afnot af prestssetri.**

## 5. gr.

Stjórn prestssetrasjóðs ákveður árlega afgjald, sem prestur innir af hendi vegna afnota sinna af prestssetri/prestssetursjörð, meðan hann gegnir embætti og fer með forráð prestssetursins/prestssetursjarðar, sbr. 2. gr. reglna þessara.

Til viðmiðunar árlegs afgjalds skal stjórn prestssetrasjóðs taka fasteignamat þeirra eigna sem prestur hefur full umráð yfir, eins og það er 1. desember næst á undan gjaldaári, svo og einnig þau lögboðnu gjöld sem innt eru af hendi af hálfu prestssetrasjóðs vegna þessara sömu eigna.

Ákvörðun afgjalds skal tekin fyrir eitt ár í senn og skal því jafnað niður á gjaldaárið með mánaðarlegum greiðslum frá 1. júní til 31. maí og skal það tilkynnt leigutökum fyrir 1. mars.

Afgjaldið skal jafnan innt af hendi fyrirfram fyrir hvern mánuð og það dregið af launum prests.

Prestur greiðir ekki afgjald fyrir eigin eignir á prestssetri/jörð, ef þær eru fyrir hendi. Þá greiðir prestur ekki afgjald af þeim hluta prestsseturs/jörð er ekki nýttist honum og sem stjórn sjóðsins hefur samþykkt að prestur skuli ekki hafa afnot af eða umráð yfir.

## 6. gr.

Stjórn prestssetrasjóðs getur að ósk prests lækkað afgjald fyrir prestssetur í eftirfarandi tilvikum:

1. Þegar einungis hluti prestsseturs getur nýst presti, af ástæðum sem honum verður ekki gefin sök á eða sem hann hefur ekki á valdi sínu að breyta.
2. Ef breytilegur rekstrarkostnaður prestsseturs er hærri en eðlilegt getur talist miðað við sambærilegar fasteignir.
3. Vegna löglegra leyfa.
4. Ef sérstakt álag er á prestssetri sem leiðir til sérstakra skyldna eða umönnunar við jörðina eða staðinn.

Endurgjald fellur þó ekki niður vegna sumarleyfa og gildir þar einu þótt um uppsafnað sumarleyfi kunni að vera að ræða.

Stjórn prestssetrasjóðs er heimilt að mæla svo fyrir að ákvarðanir um þessi efni skuli vera tímabundnar. Ákvörðun á grundvelli 3. tl. gildir þó aldrei lengur en níu mánuði nema alveg sérstaklega standi á. Þá er heimilt að fella ákvörðun úr gildi ef forsendur hennar hafa breyst.

Ákvarðanir sjóðsstjórnar samkvæmt 1. og 2. tl. falla sjálfkrafa úr gildi er prestur lætur af embætti og afhendir prestssetur.

Sjóðsstjórn getur þó ákveðið að ákvarðanir um lækkan leigugjalds skuli haldast að einhverju eða öllu leyti áfram þótt prestaskipti verði.

Þegar svo hagar til, að leigugjald er lækkað á grundvelli 1. tl. þessarar greinar, skal að jafnaði litið svo á, að prestur fari áfram með umráð þess hluta prestssetursins og beri ábyrgð á honum eins og prestssetrinu að öðru leyti, en tekið skal tillit til þeirrar ábyrgðar svo og annarra kvaða eftir því sem við á við ákvörðun um lækkan á leigu.

## 7. gr.

Prestssetrasjóður annast lögboðnar váttryggingar á prestssetrum. Innir sjóðurinn af hendi iðgjöld vegna nauðsynlegra váttrygginga prestssetra og öll fasteignagjöld af þeim, þ.m.t. fasteignum sem prestur kann sjálfur að eiga.

**Um framkvæmdir o. fl.**

## 8. gr.

Um stöðu prests og prestssetrasjóðs fer að öðru leyti eftir ákvæðum ábúðarlaga eða húsaleigulaga, eins og við getur átt.

**Stjórn úttekta.**

## 9. gr.

Prestssetur skal ávallt tekið út við skil prests á því. Viðtakandi prestur á rétt á því að fá prestssetur tekið út í hendur sér ef 1. mgr. á ekki við, svo sem ef prestssetur hefur ekki verið setið, eða ef um nýtt prestssetur er að ræða.

Prestur á rétt á því að fá prestssetur tekið út, ef hann sýnir fram á nægilega hagsmuni sína af því.

Stjórn sjóðsins ákveður hverju sinni hvort prestssetur skuli tekið út eftir endurbætur á því.

Kostnaður við úttektir greiðist af prestssetrasjóði.

Prófastur stýrir úttekt. Hann gætir þess að boða fulltrúa frá stjórn prestssetrasjóðs með hæfilegum fyrirvara, til að vera viðstaddan úttekt. Stjórn prestssetrasjóðs ákveður hvort tilefni er til að mæta við úttektina og tilkynnir prófasti, ef ekki verður mætt. Ef um minniháttar hagsmuni þykir vera að ræða getur stjórn prestssetrasjóðs gert grein fyrir sjónarmiðum sínum og óskum skriflega, áður en til úttektar kemur og sent prófasti er leggur það fyrir úttektarmenn.

**Um hlutverk vígslubiskupa, prófaste og kirkjuþingsfulltrúa.**

## 10. gr.

Viðkomandi vígslubiskup og prófastur hafa eftirlit með prestssetri og geta þeir ásamt kirkjuþingsfulltrúum gert tillögur til stjórnar prestssetrasjóðs um framkvæmdir á prestssetri. Prófastur gætir sérstaklega að hvers konar réttindum sem tilheyra prestssetrinu, sbr. eldri ákvæði þar um.

**Um stjórn prestssetrasjóðs.**

## 11. gr.

Stjórn prestssetrasjóðs fer með yfirstjórn prestssetra. Stjórn og framkvæmdastjóri skulu á hverju reikningsári semja ársreikning. Jafnframt skal samin skýrsla stjórnar fyrir liðið starfsár. Stjórn og framkvæmdastjóri skulu undirrita ársreikninginn og leggja hann endurskoðaðan fyrir kirkjuþing til samþykktar.

Stjórnin stýrir prestssetrasjóði og ákveður ráðstöfun inneigna á fyrningarsjóðum prestssetra, samkvæmt 2. gr. Stjórnin ákveður hvernig rekstri sjóðsins er hagað samkvæmt fjárhagsáætlun sem kirkjuþing samþykkir. Sérstakur framkvæmdastjóri fer með daglega stjórn sjóðsins.

Stjórn prestssetrasjóðs hefur hlutverk landsdrottins gagnvart prestum á prestssetursjörðum samkvæmt ábúðarlögum og öðrum lögum og hlutverk leigusala gagnvart presti í prestsbústað samkvæmt húsaleigulögum, með þeim afbrigðum sem kunna að leiða af lögum um prestssetur og reglum þessum, svo og sérstöðu prestssetra að öðru leyti.

### Um gæslu hagsmuna og fyrirsvar.

12. gr.

Stjórn prestssetrasjóðs hefur almennt fyrirsvar vegna prestssetra út á við svo sem gagnvart stjórnvöldum og Alþingi, og í dómsmálum þeirra vegna, og gætir almennra og sérstakra hagsmuna prestssetra í samráði við hlutaðeigandi prest, prófast og vígslubiskup, eins og við á.

Stjórn prestssetrasjóðs hefur gætur á lagasetningu, lagabreytingum eða setningu eða breytingu stjórnvaldsfyrirmæla á sviði kirkjumála.

### Um heimildarskjöl.

13. gr.

Sjóðsstjórn gerir almennt byggingarbréf fyrir prestssetursjarðir og almennan samning vegna prestsbústaða. Hið almenna byggingarbréf og hinn almenni samningur ásamt reglum þessum skal liggja frammi á biskupsstofu og hjá próföstum til sýnis fyrir umsækjendur um prestsembætti þar sem prestssetur fylgir.

Á grundvelli þessara skjala skal gerður samningur milli prests og prestssetrasjóðs um umráð og afnot prests af prestssetri.

Skal samningur þessi ávallt undirritaður áður en prestur fær prestssetrið afhent til umráða. Jafnframt skal presti greint frá því hvar prestssetrið stendur í röð framkvæmda hjá prestssetrasjóði hvað varðar viðhald og framkvæmdir einstakra þátta.

### Um ásýnd prestssetra o. fl.

14. gr.

Stjórn prestssetrasjóðs ákveður hvernig umbúnaður á prestssetri er, vegna ferðapjónustu, fornminja, náttúruminja og annars þess háttar, sem lýtur að ytri ásýnd prestssetrana, að því leyti sem lög og samningar mæla ekki á annan veg eða eðli málsins er með þeim hætti.

### Um nýbyggingar og framkvæmdir prestssetrasjóðs á prestssetrum.

15. gr.

Stjórn prestssetrasjóðs tekur ákvarðanir um nýbyggingar á prestssetrum að fenginni umsögn biskupafundar og kirkjuráðs. Stjórnin ákvarðar einnig um kaup og leigu húseigna þar sem sóknarprestsembætti er án prestsseturs sem og ákvarðar hún hverjar framkvæmdir til endurbóta á prestssetrum skuli ráðast í og röð þeirra. Allar framkvæmdir stjórnar skulu taka mið af fjárhagsáætlun sem kirkjuþing samþykkir. Prestssetrasjóði er heimilt að leita eftir fjárstuðningi viðkomandi sókna sem og annarra aðilja þegar ráðist er í mjög fjárfrekar framkvæmdir.

16. gr.

Ef prestssetur er ekki setið af presti, vegna þess að prestakall er prestslaust eða vegna samnings milli prests og stjórnar um slíka ráðstöfun, með samþykki þeirra aðilja sem lög ákveða, fer prestssetrasjóður með öll réttindi og skyldur sem prestssetrið varða og ákveður stjórn prestssetrasjóðs hvernig prestssetrinu skuli ráðstafað og/eða um það sinnt. Þess skal ávallt gætt að prestssetur sé laust til afnota fyrir prest, jafnskjótt og hann tekur við embætti eða eins fljótt og verða má eftir þann dag.

Ef prestssetur er ekki setið af presti til frambúðar eða um lengri tíma, m. a. vegna sam-  
einingar prestakalla, skal stjórn prestssetrasjóðs fara með vörslu og fyrirsvar prestssetursins.

Stjórn prestssetrasjóðs getur samið við prófast um að hafa eftirlit með ósetnu prestssetri og sjá um málefni þess, eða prestssetri sem leigt hefur verið öðrum en presti.

Sé prestssetur leigt öðrum en presti, semur stjórn sjóðsins um leigukjör við hlutaðeigandi, sbr. þó 4. mgr. Presti er heimilt, með samþykki stjórnar prestssetrasjóðs, að leigja prestssetur þriðja manni um skamma hríð, svo sem t.d. meðan prestur er fjarverandi í námsleyfi. Skal þá litið svo á að prestur beri fulla ábyrgð á prestssetrinu, eins og hann sæti það með venjulegum hætti, sbr. 1. og 2. gr. reglna þessara.

17. gr.

Starfsreglur þessar, sem settar eru með heimild í 59. gr. laga um stöðu, stjórn og starfshætti þjóðkirkjunnar nr. 78/1997, öðlast gildi nú þegar.

*Gjört í Reykjavík, 8. nóvember 2000.*

Jón Helgason  
forseti kirkjuþings.

Gunnar Sveinsson  
þingskrifari.“

Starfsreglur þessar eru hér með kunngerðar almenningi.

*Reykjavík, 8. nóvember 2000.*

F. h. kirkjuráðs,

**Karl Sigurbjörnsson** biskup Íslands.

## AUGLÝSING

### um starfsreglur kirkjuþings um breyting á starfsreglum um úrskurðarnefnd og áfrýjunarnefnd nr. 730/1998.

#### „STARFSREGLUR

um breyting á starfsreglum um úrskurðarnefnd og áfrýjunarnefnd nr. 730/1998.

1. gr.

Framan við 1. mgr. 6. gr. bætist nýr ml. svohljóðandi: Úrskurðarnefnd kannar, áður en málsmeðferð hefst, hvort viðhlítandi sáttaumleitani hafi farið fram, skv. gildandi starfsreglum hverju sinni.

Í stað orðanna „vikið úr starfi“ í 3. mgr. komi: veitt leyfi frá starfi.

2. gr.

17. gr. orðist svo: Í úrskurði vegna agabrota getur nefndin gripið til eftirfarandi úrræða:

- a. lagt til að starfsmanni verði veitt áminning, eftir atvikum með skilyrðum eða leiðbeiningum eða nánari fyrirmælum um rétta starfshegðun,
- b. mælt fyrir um að hann skuli fluttur til í starfi,
- c. mælt fyrir um að hann skuli ekki gegna núverandi starfi eða sambærilegu starfi eða köllum á kirkjulegum vettvangi um ákveðið tímabil eða til frambúðar eða
- d. lagt til endanlega brottvikningu hans úr hvaða starfi sem er á kirkjulegum vettvangi sem valdsvið nefndarinnar nær til.

3. gr.

19. gr. orðist svo: Málsaðilar bera sjálfir kostnað sinn vegna meðferðar máls fyrir úrskurðarnefnd. Kristnisjóður greiðir að jafnaði kostnað við störf úrskurðarnefndar, sbr. 35. gr. Heimilt er þó nefndinni að ákveða að annar eða báðir málsaðilar greiði kostnaðinn.